

R-9487

Abriu 98

# Revista de debat



**Eth Parlament de Catalonha apròve era propòsta impulsada per UA, tara concession de bèques.** Aquesta mesura afectarà a toti es joeni universitaris. Era propòsta presentada peth PSC, rebaisharà es nauti còsti des familíes deth Pirenèu qu'an d'afrentar es despenes de viatges e allotjaments des hilhs en edat universitaria.

**Era carretèra comarcau 142 entre Vielha e Baqueira-Beret patís un tap de trafic de tres ores per culpa dera nhèu.** Eth passat diuendres onze d'abriu, vacances dera Setmana Santa, es toristes que pujauen na esquiar patiren un monumentau tap de trafic de mès de tres ores. Era febla nheuda colapsèc era carretèra e produsic longues coes. Aquesta situacion met en evidéncia qu'es nòstes infrastructures non son ara nautada deth nombre de visitants que recep Aran. Milhor non pensar ce que passarie s'es nheuades auessen era freqüencia e intensitat de d'auti còps. Se mos servis de consou podem acuelhè-mos as paraules deth Sindic, S.Barrera, que hè quauqui mesi didec ena ràdio : es toristes de Barcelona ja son acostumadi as coes deth peatge de Martorell...

**Dempús deth "medicamentazo" er IRPF.** Eth PP e Convergència an pactat era reforma deth IRPF e atau com heren damb eth "medicamentazo", era reforma perjudique as rentes mieges, ei a díder as treballadors. Es rentes mès nautes s'estauviaràn de pagar uns 400.000 milions de pessetes as arque der estat. Ara resulte qu'er esfòrç de non pagar es medicaments ère tà que poguessen rebaishar es impòsti as que mès n'an... Com didie ua editoriau d'un

diari dera província eth PP -e CIU-cumplisen damb es sòn.

**Era assisténcia ara tercièra edat ja non da cap de problèma.** Açò madeish alleguèc eth Sindic d'Aran as protèstes d'UA per auer suprimit eth servici public d'assisténcia ara gent grana. Evidentment, suprimit eth servici s'acabèren es problèmes.

**Unitat d'Aran seguirà demanant un nau Plan Generau tath Naut Aran.** Dempús des declaracions deth Conselhèr Macias, seguirem reclamant transparéncia ena gestion der urbanisme en Naut Aran, ei plan per aquerò que se hè de besonh un nau Plan Generau que ordene e definisque es critèris de creishement en aquestes propièu annades.

**Eth Conselhèr de torisme deth Conselh Generau d'Arane eth sòn assessor anoncièn eth crubament de ua taxa as establiments toristics.** Aquesta informacion siguec plan lèu desmentida peth Sindic d'Aran. Totun ei sintomatic qu'era unica propòsta en ambit toristic, ath delà des sopars e reünions, age estat era d'aplicar naues taxes.

**Tres membres deth Conselh Generau se'n van tà Paris tara inaguracion dera "Maison de Catalogne",** interesant e patriotic viatge. Totun, dejà que les ac vam a pagar entre toti, que mos expliquen se'n París es aranesi auem -ath delà der interès per hèr torisme ena polida capitau de França- quauque ahèr vinculat tamb eth Conselh Generau d'Aran.